



Rede Defensor Direitos Umanus (RDDU)

Rua: Faról, Dili Karaketu, Timor-Leste

Nu. telefone (+670) 77345564 / 7759596

KOMUNIKADU IMPRENSA

RDDU Preokupa ho Deklarasaun Xefe Estadu Maijor F-FDTL, tamba Perigu ba Futuru Estadu de Direitu Demokrátiku Timor-Leste

Rede Defensor Direitos Umanus (RDDU) husu ba ema hotu, no liu-liu lideransa sira Estadu nian ne'ebé nu'udar ezemplu ba povu tomak, atu tane aas no promove prinsipiu no valor sira direitus umanus, justisa no demokrasia.

Iha prosesu luta ba libertasaun patria, direitus umanus hanesan baze fundamental ba povu Timor-Leste hodi luta no defende. Ikus ita atinje direitu ukun rasik a'an, no termina povu nia terus husi okupasaun ilegál militár indonézia.

Ema hotu inklui lideransa sira orgullu tanba ita-nia Konstituisaun Repúblika ida ne'ebé di'ak liu entre konstituisaun sira seluk iha mundu, tanba garante ho di'ak direitus umanus ba ema hotu hanesan. Alende ne'e, Estadu mós ratifika ona tratadu direitus umanus 7. Nune'e husu mós ba lideransa sira Estadu, atu hatudu kompromisu ba direitus umanus tuir promesa ne'ebé hakerek ona iha lei.

Rede Defensor Direitos Umanus preokupa ho deklarasaun públiku hanesan tuir mai:

1. Husi Xefe Estadu Maior General das F-FDTL ne'ebé tuir informasaun públiku halo iha 21 Dezembru 2016, fó sai deklarasaun hodi fó korajen ba forsa seguransa durante tempu Natal no Tinan Foun hodi uza forsa esesivu no tiru tohar ain ema ne'ebé halo krime no kuandu nia halai. Xefe Estadu Maior tuir informasaun hatete katak "Lalika ta'uk ho direitus umanus".¹

Rede Defensor Direitos Umanus husu ba forsa seguransa sira atu halo atuaun tuir lei no respeita ba direitus umanus, no so de'it uza forsa kuandu nesesáriu no tuir prinsipiu proporsionalidade. RDDU mós uza oportunidade ne'e hodi hato'o katak ami kondena hahalok krime ne'ebé juventude balu hatudu ne'ebé la kontribui ba estabilidade, no fó impaktu ba ema nia liberdade no seguransa. Ema hotu, inklui joven sira iha direitu, maibé mós iha devér hodi respeita ema seluk nia direitu.

2. Husi Xefe Estadu Maior General das F-FDTL, iha 1 Dezembru 2016, ne'ebé fó sai iha media, katak nia sei la fó oportunidade no la promove milisia nia oan iha F-FDTL.²

¹ *Jornál Timor-Post, 24 Dezembru 2016 no Radio Televizaun Timor-Leste, 21 Dezembru 2016*

² *Jornál Timor-Post, 2 Dezembru 2016*

Ami nu'udar defensór direitus umanus ezije nafatin responsabilizasaun ba violasaun direitus umanus ne'ebé mosu durante luta ba independénsia, inklui hosi milisia sira. Maibé oan la iha responsabilidade ba hahalok hosi inan-aman milisia iha tempu ne'ebá. RDDU konsidera deklarasaun Xefe Estadu Maior General ne'e bele hamosu diskriminasaun ne'ebé kontra tebes ita nia Konstituisaun no konvensaun internasionál ne'ebé estadu ratifika ona.

RDDU husu:

1. Ba lideransa sira Estadu nian, atu labele hamosu liafuan sira ne'ebé la apár ho prinsipiu no valor sira direitus umanus nian.
2. Ba forsa seguransa atu hala'o sira nia knaar tuir lei, inklui kuandu uza forsa ne'ebé sempre tenke tuir lei no proporsional.
3. Ba Komando F-FDTL atu fó oportunidade iguál ba membru F-FDTL hotu la-haree ba inan aman nia istória.

RDDU, ne'ebé kompostu husi ONG sira ne'ebé servisu ba direitus umanus, husu obrigadu wain ba atensaun.

Membru Rede Defensór Direitus Umanus:

1. Asosiasaun HAK
2. ALFeLa
3. AJAR
4. Acbit
5. Codiva
6. Fundasaun Mahein
7. AHMDTL (Asosiasaun Halibur Matan Defisiénsia Timor-Leste)
8. Belun
9. JSMP
10. La'o Hamutuk
11. NGO Community Based Rehabilitation

Dili, 16, Fevreiru 2017

Koordenadór RDDU

(Jose Maria Moniz)